



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Tribunál Distritál Dili

15 Jullu 2015

Tribunál Distritál Dili kondena pena prizaun tinan 10 ba arguidu krime violasaun seksuál

Iha 08 Jullu 2015, Tribunál Distritál Dili kondena arguidu RS ho pena prizaun tinan 10 tanba provadu komete krime violasaun seksuál hasoru DSV. Kazu akontese iha 03 Marsu 2014, iha Distritu Dili.

Tribunál prova katak lezada ba iha arguidu nia uma atu arguidu bele kura nia moras. Iha ne'ebá arguidu husu lezada atu hemu tua kopu idatoo lanu. Wainhira lezada lanu, arguidu husu ba lezada hodi hasai nia ropa. Maske lezada lakohi maibé arguidu hateten ba lezada katak ida ne'e nu'udar prosesu kurativu ida hodi kura nia moras. Iha ikus arguidu komete violasaun seksuál hasoru lezada.

Iha prosesu julgamentu arguidu nega faktu sira hosi akuzasaun ministériu públiku nian maibé bazeia ba deklarasaun hosi lezada, testemuña no rezultadu relatóriu mediku hosi Pradet, prova katak arguidu komete duni krime ne'e.

Bazeia prova hirak ne'e, tribunál konklui prosesu ne'e no kondena arguidu ho pena prizaun tinan 10. Maske nune'e, depoisde rona tiha leitura akordaun, defeza promete sei halo rekursu kontra desizaun tribunál iha prazu loron 15 nia laran.

“JSMP fiar katak desizaun tinan 10 prizaun ne'e sei refleta arguidu nia hahalok no bele serve hanesan meiu edukativu atu eduka sociedade atu hadook-an hosi krime violénsia seksuál hasoru fetu ne'ebé kontinua buras iha sociedade,” dehan Luis de Oliveira Sampaio, Diretór Ezekutivu JSMP.

JSMP rekomenda ba tribunál sira atu aleinde kondena arguidu sira ho pena prizaun, tribunál mós tenki kondena arguidu sira selu indemnizasaun ba vítima. Ne'e prátika diak atu rekoñese vítima nia sofrémentu nu'udar konsekuensia hosi arguidu nia hahalok nomos iha tempu hanesan involve responsabilidade sosial tanba família sira hotu involve hodi selu kompenzasaun ba vítima.

Ministériu Públiku akuza arguidu kontra artigu 172 Kódigu Penál kona-ba violasaun seksuál ho moldura penál tinan 5 to'o 15.

Depois leitura akordaun, parte defeza promete sei halo rekursu kontra desizaun tribunál iha prazu loron 15 nia laran.

Kazu ne'e rejista iha tribunál ho Nú. Prosesu: 0038/14.DIBCR. Akordaun ne'e prezide Dr. Jose Maria de Araujo hodi representa juis koletivu. Ministériu Públiku representa hosi Dra. Maria Ivonia Guterres no arguidu hetan akompañamentu hosi Dr. Marçal Mascarenhas hosi Defensória Públiku.

Atu hetan tan informasaun, favór ida kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org